



DISPVATIO XXIII.

DE CAUSA PECCATI.

THESIS I.

DE Manichæis refert D. Augustinus, quòd voluntatis humanæ libertatem, etiam quoad actiones malas & peccata, ita externo cuidam principio alligatam esse statuerint, ut homines non ex voluntatis suæ libertate: sed à contraria quapiam & inimica substantia coacti peccent. L. 1. Retractat. c. 9. l. de fide cont. Manich. c. 5.

2. Et profectò ita humanitùs comparatum est, ut nemo non causam peccati à se amoliri, inque aliud principium eam transferendo, velocior esse soleat ad excusationem, quàm ad confessionem peccatorum suorum: ut idem Augustinus præclare dicit, lib. 2. de libero arbitrio, cap. 2.

3. Exemplo esse potest tristissimus Protoplastorum lapsus: Adamo quidem causam & culpam violati mandati divini, in mulierem, imò in Deum ipsum, quippe qui talem sibi vite sociam adjunxerit: Muliere verò in serpentem transserente. Gen. 3. 12. & 13.